

von Wulf Wager

Gutmensch mit Privileg



Fir onsern Verkehrsminischer Winfried Hermann geit's jo koi schlemmer's Teufelswerk als a Auto. Er fährt am liebschta Fahrrad - zumindescht, wenn d' Presse drbei ischt.

Dr ehemalige Sportlehrer, der jo scho von seiner Ausbildung her als Verkehrsminischtr hervorragend qualifiziert ischt, hot letscht Woch miassa zoma Termin auf dr Oschtalb. Do hot'r nadierlich durch des schwer

staugeplagte Schwäbisch Gmend miassa. Ond prompt ischr em Stau gstanda, wia alle andere Leut. Weil en aber sei Termin-druck bloogt hot, hot'r sich oifach aus dem Stau gschält ond isch durch den no net eröffneta Stadttunnel von Gmend ond damit ondrn Stau durchgefahra. Des war jo schließlich a Dienschfahrt, ond so hot'r kenna glei da neue Tunnel teschta. Des hättat die andere 1000 Autofahrer, die den Stau bildet hend, au gern gmacht, aber die send halt koine Verkehrsminischtr.

En beschränkta Tunnelblick – vor allem uf Stuegert 21 – hot'r jo, sagt d' Leut. Ond Röhrajeans soll 'r au aghet han. Wenn des a Normaler gmacht hätt, no hätt 'r sein Führerschei weg ond drzua na no a saftige Geldstrof kassiert. Aber, so isch des mit de Haierla ond ihre Privilegia. 's geit halt Sotte ond Sotte. Aber mai vo de Sotte: Wasser prediga ond Wei saufa... Scheint's send de Greana doch koine so Gutmenscha, wie se ons emmr glauba macha wellat.

Bis näggschd Woch

Ihr

A handwritten signature in black ink, appearing to read 'Wulf Wager'. The signature is stylized and written in a cursive script.

Wulf Wager

Alle Kolumna zom Nochlesa

onder: www.woascht.de oder em facebook em Wulf Wager Fanclub